

ՀԱՅԱՍՏԱՆԻ ՀԱՆՐԱՅԻՆ ՌԱԴԻՈՑԻ ՀԻՄՆԱԴՐՈՒՄԸ

ՀՈՎՍԵՓՅԱՆ Մ. Մ.

Տասնամյակներ շարունակ Հայաստանի հանրային ռադիոն, լինելով հանրապետության զանգվածային լրատվամիջոցների բաղկացուցիչ մասերից մեկը, մինչև այժմ հիմնավոր ուսումնասիրված չէ և կարիք ունի գիտականվերլուծական մոտեցման*։

Հայաստանի հանրային ռադիոյի հիմնադրման համար նախադրյալներ ստեղծվեցին դեռևս 1920-ականների կեսերին։ Այդ տարիներին, չնայած Առաջին հանրապետությունից ժառանգություն մնացած Երևանի ուժեղ ռադիոկայանը դարձել էր «խոսակցական», սակայն հնարավորություն չունեի մեծ շառավղով լրատվություն տարածելու և կապ հաստատելու այլ քաղաքների և պետությունների հետ¹։ Այդ պատճառով, ինչպես անհատ անձինք, այնպես էլ որոշ տեխնիկական խմբակներ տնայնագործական, ինքնաշեն ռադիոընդունիչներով սկսել էին հաղորդումներ որսալ տարբեր երկրներից և քաղաքներից, հատկապես՝ Մոսկվայից, պարբերաբար լսել օտար ռադիոկայանների հաղորդումներ՝ մասնավորապես ֆրանսիական, թուրքական, հունական։ Այդ հաղորդումները մեծ տարածում գտան հանրապետությունում՝ հիմք հանդիսանալով ռադիոսիրողների խմբակների կազմակերպմանն ու հանրապետական նշանակության ռադիոկայանի հիմնադրմանը։ Քսանական թվականներին ռադիոխմբակներ էին ստեղծվում նաև նախկին Խորհրդային Միության շատ քաղաքներում, որոնք ցանկանում էին հաղորդակցվել տարբեր հանրապետություններում գտնվող իրենց գործընկերների հետ։ Իսկ ռադիոսիրողների շարժումը Հայաստանում սկսվել է 1924 թ. օգոստոսին, երբ մի քանի ռադիոսիրողների նախաձեռնությամբ կազմակերպվեց ռադիոսիրողների ընկերություն, որին անդամագրվեց 12 հոգի²։ Ընկերության ջանքերով Երևանի պետական համալսարանի տեխնիկական ֆակուլտետում, պրոֆեսոր Ա. Անժուրի ղեկավարությամբ, ձևավորվեցին առաջին ռադիոխմբակները, որոնց մասնակցում էին ավելի քան 100 ունկնդիրներ։ Հայաստանում ռադիոսիրողների շարժման երախտավորը ռադիոինժեներ Կոնստանտին Ավետիսյանն էր, որն հետագայում դարձավ նորաստեղծ ռադիոկայանի վարիչը։ Հետաքրքիր փաստական տվյալներ է տպագրել ռադիոսիրողների մասին երիտասարդական «Ավանգարդ» թերթը, որի 1925 թ. ապրիլի 22-ի համարում

* Հայ ժուռնալիստիկայում այդ խնդրին մասնակիորեն անդրադարձել են՝ **Պողոսյան Ստ.**, Սովետական Հայաստանի հեռուստատեսությունը և ռադիոն, Ե., 1985 թ., **Овсеян М.**, *Деятельность республиканского радио в условиях чрезвычайного положения*, М., 1991, **Մարության Ստ.**, Եթերում Երևանն է, Ե., 1998։

¹ Հայաստանի Հանրապետության Նորագույն պատմության կենտրոնական պետական արխիվ (այսուհետև՝ ՀՀ ՆՊԿՊԱ), ֆ. 191, ց. 1, գ. 84, թ. 59։

² Տե՛ս **Գույան Մ.**, Մի ակնարկ Հայաստանի ռադիոսիրողների շարժման մասին (Ռադիոաշխատող, 1937, N 4-5, էջ 26)։

գետեղված «Ուլքեր են ռադիոսիրողները» թղթակցությունում կարդում ենք հետևյալը. «Մինչև հիմա ռադիոսիրողների վրա նայում են որպես զվարճությամբ զբաղվողների: Սակայն էականն այն է, որ ռադիոն միացնում է զավառը կենտրոնին, ամենահեռու ընկած գյուղը՝ քաղաքին: Ռադիոն ամենաեծան ու ամենամատչելի միջոցն է ամենալայն զանգվածների լուսավորման գործում: Նա միաժամանակ նաև քաղաքական զենք է: Ռադիոյի առջև գլուխ են խոնարհում թե սահմանը, թե տարածությունը: Անհրաժեշտ է, որ յուրաքանչյուր երիտասարդ բանվոր և գյուղացի հետաքրքրվի ռադիոգործով, տարածի նրա գաղափարները լայն զանգվածների մեջ, ուսումնասիրի ռադիոգործը և խմբակներ կազմակերպի: Մենք պետք է ձեռք բերենք ռադիոն»: Արդեն կայացած կազմակերպությունը 1925 թ. հունվարին ընդունվում է համամիութենական ռադիոսիրողների կազմակերպության կողմից և դառնում նրա լիիրավ անդամը: Սրանից ելնելով՝ ՀԿԿ Կենտկոմը 1925 թ. փետրվարի 23-ին որոշում է ընդունում Երևանում հիմնադրելու հանրապետական նշանակության ռադիոկայան:

Ցավով պետք է նշել հայ կոմունիստների բացասական կեցվածքը Առաջին հանրապետությունից ժառանգություն մնացած պետական ռադիոկայանի նկատմամբ: Փոխանակ արդեն գոյություն ունեցող Երևանի ռադիոկայանի հիմքի վրա, կատարելագործելով ու հզորացնելով նրա տեխնիկական միջոցները և մեծացնելով ռադիոէթերի տարածման շառավիղը (ինչպես դա արեցին մեր հարևան հանրապետությունները), ստեղծեին հանրապետական նշանակության ռադիոկենտրոն, անգործության մատնեցին Երևանի ուժեղ ռադիոկայանը, որը 1926 թ. փակվեց:

Նույն թվականին ՀԿԿ Կենտկոմի որոշմամբ ստեղծվեց Կենտկոմին կից ռադիոհանձնաժողով՝ հսկողության տակ պահելու նորաստեղծ հանրապետական ռադիոկայանի հիմնադրման աշխատանքները, իսկ հետագայում կազմակերպելու նրա բնականոն աշխատանքը: «Խորհրդային Հայաստան» թերթի 1926 թ. հունիսի 13-ի համարը հայտնում է, որ սկսվել է Երևանի լայնահազորոգ ռադիոկայանի շինարարությունը, որը ԽՍՀՄ-ի մասշտաբով 12-րդ էր իր տեսակի մեջ: Պահպանված արխիվային փաստաթղթերից տեղեկանում ենք, որ «երկաթուղային կայարանի մոտ գտնվող նախկին հեռագրատան շենքում սկսվեցին ռադիոկայանի սարքավորումների մոնտաժման աշխատանքները, սարքերը բերվել էին Մոսկվայից և Նիժնի Նովգորոդից»³: Արդեն օգոստոսին շահագործման հանձնվեց 1,2 կիլովատանոց հաղորդիչ կայանը, կազմակերպվեցին առաջին փորձնական հաղորդումները: Նույն թվականի սեպտեմբերի 1-ին առաջին անգամ եթերում հնչեցին «Լսեցեք, լսեցեք, խոսում է Երևանի լայնահազորոգ կայանը» խոսքերը: Առաջին փորձնական հաղորդման ժամանակ, որը տևեց 25 րոպե, հնչեցին լուրեր և երաժշտություն»⁴:

Պահպանվել են չափազանց հետաքրքիր տեղեկություններ առաջին փորձնական հաղորդումների նախապատրաստման մասին, թե ինչպես ռադիոհաղորդումների կազմակերպիչները շրջում էին Երևանով մեկ՝ այս կամ այն երգչին

³ Տե՛ս ՀՀ ՆՊԿՊԱ, ֆ. 127, ց. 1, գ. 11, թ. 146:

⁴ Տե՛ս նույն տեղում:

գտնելու և ռադիոկայան հրավիրելու համար, որը ոչ միշտ էր հաջողվում⁵: Հանրապետության գլխավոր օրաթերթը՝ «Խորհրդային Հայաստանը», նույնպես հետաքրքիր փաստեր է տպագրել առաջին ռադիոհաղորդումների մասին: «Ռադիոգրություն Երևանից» թղթակցության մեջ ասվում է. «Երկու օր է արդեն, որ Երևանի լայնահաղորդ ռադիոկայանը փորձական աշխատանք է կատարում ինքնուրույն տեղեկություններ հաղորդելու: Ռադիոկայանից հաղորդված խոսակցությունները, երգեցողությունը և դաշնամուրի ձայնը այլ վայրերում լսվում են շատ պարզ և առանց աղավաղման: Ռադիոհաղորդումներ հաղորդելու փորձը կատարված է 850-1050 մետր երկարություն ունեցող ռադիոալիքներով: Այժմ փորձ է արվում ռադիոհաղորդումներ լսելու բնակարաններում՝ առանց ցանցի ընդունող ապարատը միացնելու էլեկտրական թելերի հետ»⁶: Հետագա օրերին ևս «Խորհրդային Հայաստանը» իր ուշադրության կենտրոնում է պահում ռադիոյի փորձարկման աշխատանքները և պարբերաբար անդրադառնում դրան: Թերթը սեպտեմբերի 12-ի համարում «Երևանի լայնահաղորդ ռադիոկայանի փորձարկումը շատ հաջող անցավ» թղթակցության մեջ նշում է, որ «վերջին տեղեկությունների համաձայն, կայանի հաղորդումները լսվում են հազար կիլոմետր հեռավորության վրա», իսկ սեպտեմբերի 26-ի համարը գրում է. «Հանձնաժողովը գտավ, որ Երևանի ռադիոկայանը Անդրկովկասի առաջնակարգ կայաններից է և անհրաժեշտ համարեց իսկույն ևեթ անցնել կայանի օգտագործմանն ու բարձրախոսների տարածմանը»:

Սակայն ռադիոհաղորդումները դեռևս պարբերական բնույթ չէին կրում. նորաստեղծ ստեղծագործական կոլեկտիվի աշխատանքը կանոնակարգվելու, համապատասխան հմտություն և փորձ ձեռք բերելու համար դեռևս ժամանակ էր հարկավոր: Հայ ռադիոժուռնալիստիկայի տեսության մեջ հանրային ռադիոյի պարբերական հաղորդումների հիմնադիր օրվա վերաբերյալ տարակարծություններ գոյություն ունեն: Մինչև վերջերս ընդունված էր 1926 թ. նոյեմբերի 7-ը. ռադիոյի ծնունդը կապվում էր Հոկտեմբերյան սոցիալիստական մեծ հեղափոխության հերթական տարեկիցի հետ⁷: Ոչ վաղ անցյալի մոտեցումը միանգամայն հասկանալի էր: Նորօրյա հետազոտողը փորձել է ռադիոյի հիմնադրումը կապել հայ ժողովրդի նկատմամբ «կոմունիստական կուսակցության հոգատար վերաբերմունքի հետ»: Ռադիոյրագրող Ստ. Մարությանի կարծիքով, ռադիոյի պարբերական հաղորդումները եթեր են տրվել 1927 թ. ապրիլի 6-ին⁸: Խորհրդային ռադիոյի օրվան նվիրված համարում «Խոսում է Երևանը» շաբաթաթերթը նույնպես նշում է 1927 թ. ապրիլի 6-ը⁹, երբ հանրապետական մամուլում առաջին անգամ տպագրվեցին ռադիոժրագրերը: Իսկ 1937 թ. մասնագիտական բանավիճային «Ռադիոաշխատող» ամսագրում այն ժամանակվա ռադիոկոմիտեի նախագահ

⁵ Տե՛ս **Գույան Մ.**, Ռադիոյի երաժշտական հաղորդումները (Ռադիոաշխատող, 1937 թ., N 4-5, էջ 39):

⁶ Տե՛ս Ռադիոգրություն Երևանից (Խորհրդային Հայաստան, 3.IX.1926):

⁷ Տե՛ս **Պողոսյան Ստ.**, նշվ.աշխ., էջ 7:

⁸ Տե՛ս **Մարության Ստ.**, նշվ. աշխ., էջ 11:

⁹ Տե՛ս Սովետական ռադիոյի օրը (Խոսում է Երևանը, 7-15.V.1962):

Գառնիկ Ղազարյանը Հայաստանի ռադիոհաղորդումների և ռադիոֆիկացման 10-ամյակի կապակցությամբ նշում է 1927 թ. հունիսի 15-ը¹⁰: Մեր կարծիքով՝ ստույգն այս թվականն է: Գառնիկ Ղազարյանը ռադիոկայանի հիմնադիրներից էր, եղել է այդ հաղորդումների կազմակերպման անմիջական մասնակիցը և հոգիվածը հրապարակելիս էլ ռադիոկոմիտեի նախագահն էր:

Հանրային ռադիոյի հաղորդումների պարբերականությունը կանոնակարգելու և հաճախականությունը կարգավորելու համար իրադարձային էր հանրապետական մամուլում ռադիոծրագրերի լույսընծայումը: 1927թ. ապրիլի 6-ին հանրապետական մամուլում տպագրված առաջին ռադիոծրագրերը կազմված էին հիմնականում լուրերից և համերգներից: Այդ ծրագրերում ընդգրկվում էին նաև այն ժամանակ շատ տարածված ռադիոթերթերը, որոնք պարունակում էին ինչպես օպերատիվ, այնպես էլ ժամանակավրեպ լրատվություն: Ռադիոթերթերը պատրաստվում էին կոնկրետ խավի կամ սոցիալական խմբի համար: Հանրապետական ռադիոն պարբերաբար եթեր էր տալիս բանվորական, գյուղացիական, պիոներական և զինվորական ռադիոթերթեր, որոնք ռադիոունկնդիրներին էին մատուցվում դասախոսությունների և հանրամատչելի գրույցների տեսքով: Սկզբնական շրջանում՝ փորձական հաղորդումների ժամանակ, ռադիոն հիմնականում աշխատում էր երեկոյան ժամերին՝ 18-24-ը, իսկ ապրիլի 6-ից յուրաքանչյուր կիրակի հաղորդումները եթեր էին տրվում ժամը 11-ից մինչև 13-ը և երեկոյան՝ 17.30-24.00: Ռադիոհաղորդումների եթերային պարբերականությունը պահպանվել է երեքշաբթի, հինգշաբթի և կիրակի օրերին: Չնայած ռադիոհաղորդումների պարբերականությանը՝ ռադիոծրագրերը ոչ միշտ էին լիարժեք. նյութերի սղության պատճառով դրանք հաճախ կազմվում էին հապճեպ և ոչ պրոֆեսիոնալ մակարդակով: Այդ տարիների ամենատարածված ռադիոթերթերից էր «Բանվորական ռադիոթերթը»: Ժամանակի պահանջին համահունչ այդ ռադիոթերթը պարբերաբար լրատվություն էր հաղորդում երկրում տեղի ունեցող կարևոր իրադարձությունների և դեպքերի մասին: Այն բաղկացած էր մի քանի կայուն խորագրերից: Ռադիոթերթի առաջնորդողը, որպես կանոն, քարոզչական ռադիոգրույց էր՝ նվիրված կուսակցական և բանվորական կյանքին ու առօրյային: Ռադիոթերթը յուրաքանչյուր համարում պարտադիր ընդգրկում էր բանգյուղթղթակիցների ուղարկած տեղական թղթակցություններն ու ակնարկները, ինչպես նաև Մոսկվայից՝ ռուսերենով հաղորդվող լուրերը, թղթակցություններ՝ գիտության և տեխնիկայի վերջին նվաճումների մասին: Ռադիոթերթը թեմատիկ էջեր էր հատկացնում հանրապետությունում տեղի ունեցող կարևոր իրադարձությունների և դեպքերի մասին: Ռադիոթերթերը պատրաստվում էին հանրապետական թերթերի խմբագրություններում՝ պատասխանատու բաժնի վարիչների կողմից և եթեր հեռարձակվում ռադիոյի աշխատակիցների ջանքերով:

Հիմնադրման առաջին տարիներին ռադիոկայանի հեռարձակման շառավիղը այնքան էլ մեծ չէր, այն հիմնականում ընդգրկում էր Երևանն ու շրջակա գյուղերը:

¹⁰ Տե՛ս **Ղազարյան Գ.**, Սովետական Հայաստանի ռադիոհաղորդման և ռադիոֆիկացման 10 տարին (Ռադիոաշխատող, 1937, N 6, էջ 7):

Հանրապետությունում գործող ռադիոսիրոդների ջանքերով և օժանդակությամբ առաջին իսկ տարում՝ 1927 թ., ռադիոֆիկացվեց 25 գյուղ, հաջորդ տարում՝ ևս 40-ը՝ ռադիոընդունիչների թիվը հասցնելով 200-ի, որից 80-ը Երևանում: 1928 թ., ռադիոհաղորդումների լսելիության շառավիղը ընդլայնելու և մասնագիտական կադրեր պատրաստելու համար, ՀԽՍՀ ժողովուրդի որոշմամբ, հաղորդումների ղեկավարումը հանձնարարվեց լուսժողովուրդին, իսկ տեխնիկական սպասարկումը՝ փոստհեռժողովուրդին: Ռադիոունկնդիրների շրջանակը մեծացնելու նպատակով ռադիոֆիկացվեցին մշակութային օջախները, ինչպես նաև պետական թատրոնը, կոնսերվատորիան, կուլտուրայի տունը, գյուղացու տունը, Կարմիր բանակի տունը, հասարակական վայրերում տեղադրվեցին բարձրախոսներ¹¹: Առաջին տարիներին ռադիոյում դեռևս չկային հաղորդավարներ, ուստի ռադիոխոսնակի պարտականությունները կատարում էին ռադիոյի աշխատակիցները կամ հաղորդվող հոդվածների, զրույցների, թղթակցությունների հեղինակները: Միայն 1929 թ. սկսած ռադիոհաղորդումները սկսեցին վարել հաղորդավարները: Հանրային (հանրապետական) ռադիոյի առաջին հաղորդավարներն են եղել Վերգինե Բաբայանը և Սուրեն Քանանյանը (ի դեպ, Ս. Քանանյանը որպես ռադիոստ աշխատել է նաև Առաջին հանրապետության ռադիոկայանում):

Հանրապետական նշանակության ռադիոկայանը արդեն հաջորդ տարում չի կարողանում բավարարել լսարանի աճող պահանջները. շենքային սուղ պայմանները և նոր տեխնիկայի բացակայությունը այլևս հնարավորություն չէին տալիս նրան ավելի արդյունավետ ու օպերատիվ կազմակերպելու աշխատանքները: Այդ նպատակով, մինչև Երևանում ռադիոյի կենտրոնական ստուդիայի շենքի կառուցվելը՝ «Անդրփոստ-հեռժողովուրդը տրամադրում է 700 ռուբլի, իսկ Երթաղ-խորհուրդը հատկացնում է չորս սենյակ նորակառույց «Երևան» հյուրանոցի վերջին հարկում: Ստուդիան միացվում է Քանաքեռում շահագործման հանձնված Աթարբեկյանի անվան «ՌՎ-21» ռադիոկայանին՝ Երևանի հասարակական վայրերում տեղի ունեցող զեկուցումները, համերգները, ելույթները և հանդեսները Հայաստանի զանազան գավառներ և քաղաքներ հաղորդելու նպատակով, ընդարձակվում է նաև լրատվության հաղորդման շառավիղը: Քանաքեռում շահագործման հանձնված ռադիոկայանին բազմիցս անդրադարձել է նաև «Խորհրդային Հայաստան» թերթը: Դեռևս 1927 թ. օգոստոսի 15-ին «Քանաքեռում ռադիոկայան է կառուցվում» թղթակցության մեջ թերթն իր ընթերցողներին հայտնում է. «Մոտ ժամանակներս Քանաքեռում վերսկսվելու են 4 կիլովատ ուժ ունեցող ռադիոկայանի կառուցման աշխատանքները: Կայանը պատրաստ կլինի 1928 թվականին»¹²: Նույն ռադիոկայանի մոնտաժման աշխատանքներին խանգարող օբյեկտիվ պատճառներին թերթն անդրադարձել է 1929 թ. հունիսի 7-ի «Ինչու է ձգձգվում Քանաքեռի ռադիոկայանի մոնտաժման աշխատանքները» թղթակցությունում: Թղթակցության մեջ նշվում է. «Կայանի ուշ գործի դրվելու գլխավոր պատճառը Թիֆլիսի նոր կառուցվող կայանի շահագործման ձգձգումն է,

¹¹ Տե՛ս 1928 թվականի տարեգրության էջեր (Եթերում է Երևանը, 14.X.1967):

¹² Քանաքեռում ռադիոկայան է կառուցվում (Խորհրդային Հայաստան, 15.VIII.1927):

որն ունենալու է 20 կիլովատ հզորություն: Նախկին ռադիոկայանը, որը գտնվում է Նավթլուղում, ունի 4 կիլովատ ուժ:

Վերջնականապես որոշված է Նավթլուղի մոտ գտնվող այդ ռադիոկայանի սարքավորումը փոխադրել Հայաստան՝ Քանաքեռի ռադիոկայանի համար: Այս կայանի սարքավորումը (խոսքը 4 կվտ ռադիոկայանի մասին է) համապատասխանում է տեխնիկայի վերջին խոսքին և ավելի նոր է: Կայանը վերջնականապես պատրաստ կլինի և գործի կդրվի այս տարվա սեպտեմբեր կամ հոկտեմբեր ամսին: Հայաստանում Քանաքեռի ռադիոկայանը լինելու է առաջինը թե իր սարքավորումներով, թե ուժով»:

Քանաքեռի ռադիոկայանի սարքավորումները երկար ձգձգումներից հետո Երևան են հասել միայն 1929 թ. դեկտեմբերի սկզբներին, այդ պատճառով էլ ռադիոկայանը սկսել է գործել 1930 թ. մարտի վերջին¹³: Նորաբաց Քանաքեռի ռադիոկայանը ի վիճակի էր կապ հաստատել Խորհրդային Միության բոլոր խոշոր քաղաքների և արդյունաբերական կենտրոնների ռադիոկայանների, անգամ եվրոպական մի շարք ռադիոկայանների հետ: Նոր ռադիոկայանի շահագործումը հնարավորություն տվեց կազմակերպելու երաժշտական հաղորդումներ տարբեր տարիքային և սոցիալական խմբերի համար: Այդ նպատակով օգտագործվում էր ինչպես կենդանի հնչողությունը, այնպես էլ գրոմոֆոնային երաժշտություն: Իսկ առաջին երաժշտական համույթը՝ Արևելյան անսամբլը, ռադիոկոմիտեում ձևավորվեց 1928 թ., որին նվագակցում էին Սողոմոն Ալթունյանը, Սողոմոն Մեյրանյանը, Լևոն Մադոյանը, Արտեմ Մեջինյանը և ուրիշներ: Համույթը 1960 թ. վերանվանվեց «Հայկական ժողովրդական գործիքների անսամբլ», որը ժողովրդական երաժշտության երախտավոր Ա. Մերանգուլյանի ղեկավարությամբ մեծ ներդրում ունեցավ ժողովրդական երաժշտության տարածման գործում: Իսկ երկու տարի անց համույթը արժանացավ ժողովրդականի կոչման և կոչվեց Արամ Մերանգուլյանի անունով: Այն հաջողությամբ գործում է նաև մեր օրերում:

1920-ական թվականների վերջերին և 30-ականի սկզբներին ձևավորվեցին ռադիոյի սիմֆոնիկ նվագախումբը և երգչախումբը՝ մեր արվեստի խոշոր գործիչներ Ռ. Ստեփանյանի, Թ. Ալթունյանի և Կ. Զաքարյանի ղեկավարությամբ, 25 հոգուց բաղկացած երգեցիկ խումբը ղեկավարում էր Լենինգրադի (այժմ՝ Սանկտ Պետերբուրգ) կոնսերվատորիայի շրջանավարտ, երիտասարդ խորմայստեր Թաթուլ Ալթունյանը¹⁴: Ռադիոյով պարբերաբար ելույթ էին ունենում կամերային անսամբլը, լարային տրիոն, փողային նվագախումբը: Իսկ այս ամենը սկսվեց ընդամենը մի քանի փոքրիկ արևելյան անսամբլներով, այսպես կոչված, սազանդարներով, որոնք նոր բացված երաժշտական ստուդիայի ուսուցիչներն ու աշակերտներն էին: Ահա այսպիսի կադրերի օգնությամբ կազմակերպվեցին ռադիոյի առաջին երաժշտական հաղորդումները: Հանրապետական ռադիոն երաժշտական բաժնում մեծ տեղ էր հատկացնում նաև օպերաներին ու բալետներին. հայկական օպերաներից առաջինը ռադիոյով հաղորդվել են Ա.

¹³ Տե՛ս **Մարության Ստ.**, նշվ. աշխ., էջ 18:

¹⁴ Տե՛ս **Տոնիկյան Ա.**, Երաժշտական հաղորդումները երկրորդ տասնամյակի շեմին (Ռադիոաշխատող, 1937, N 6, էջ 21):

Տիգրանյանի «Անուշի» և Ա. Խաչատրյանի «Գայանեի» մոնտաժները: Այդ նպատակով օգտագործվում էին նաև Մոսկվայից պարբերաբար ստացվող տոնֆիլմերը, որոնցից «Կարմեն» օպերայի մոնտաժը և «Եվգենի Օնեգինը» մեծ հետաքրքրություն առաջ բերեցին ռադիոլսարանում: Ռադիոտունկողիքների համար հատուկ կազմակերպվում էր երաժշտական ինքնակրթության հաղորդումների շարք՝ ընդգրկելով տարբեր տարիքային խմբերի և սոցիալական խավերի: Այդ տարիներին առավել պրոպագանդիկո ձևերից էին՝ ա) առանձին կատարողների համերգները, բ) երգերի ուսուցման ժամերը, գ) համերգ-հանելուկները:

Ընդհանուր հաղորդման ցանցում երաժշտական հաղորդումները հասնում էին 70%-ի: Օրական միջին հաշվով կազմակերպվում էր 4-5 երաժշտական հաղորդում, ամիսը՝ 90-100 համերգ: Դրանք, ինչ խոսք, բարձրացնում էին ռադիոտունկողիքների երաժշտական կուլտուրան, նրպաստում էին հանգստի կազմակերպմանը: Ուշագրավ վիճակագրություն է պահպանվել Ա. Տոնիկյանի մի հոդվածում, ըստ որի, 1928-1929 թթ. ռադիոյի երաժշտական հաղորդումների 85 %-ը կազմում էր արևելյան երաժշտությունը, 1929-1932 թթ. այն ընդամենը 60-65 % էր, իսկ 1933-1937 թթ. եվրոպական և արևելյան երաժշտության տոկոսները հավասարվեցին¹⁵:

Չնայած երաժշտական հաղորդումները մեծ տեղ էին գրավում ռադիոյի ընդհանուր հաղորդումների ցանցում, այնուամենայնիվ, գլխավոր դերում մնում էին հասարակական-քաղաքական հաղորդումները: Դրանց միջոցով լսարանին էին մատուցվում «Վերջին լուրերի» թողարկումները, ռադիոթերթերը, արտաստուդիական, ինչպես նաև կուլտուր-լուսավորչական բնույթի հաղորդումներ (ինչպես, օրինակ, «Համալսարանը ռադիոյով»):

Հասարակական-քաղաքական հիմնական հաղորդաշարը՝ «Վերջին լուրեր» ծրագիրն էր, որի անդրանիկ հաղորդումը եթեր հեռարձակվեց 1929 թ. մայիսի 27-ին, և որը դարձավ պարբերական՝ օրական եթեր հեռարձակելով 4-5 թողարկում: Ծրագիրը հետագա տարիներին աստիճանաբար մեծացրեց պարբերականությունն ու հաճախականությունը՝ դառնալով ռադիոյի կայուն և սիրված հաղորդումներից մեկը: Ժամանակին ծրագրի հիմնադրմանը ջերմորեն արձագանքել էր հանրապետության գլխավոր օրաթերթը՝ «Խորհրդային Հայաստանը»։ մասնավորապես 122 համարում ողջունելով օպերատիվ լրատվական ծրագրի ստեղծումը՝ թերթը հույս էր հայտնում, որ այն կծառայի իր նպատակին և հանրապետության բնակչությանը կհաղորդի օպերատիվ լրատվություն: Ամեն օր «Վերջին լուրերի» միջոցով հանրապետության ռադիոլսարանին էին մատուցվում Հայաստանում և արտերկրներում տեղի ունեցող առավել կարևոր դեպքերի և իրադարձությունների մասին ներկայացվող ամփոփագրերը: «Վերջին լուրերի» խմբագրությունը իր հաղորդումներում ընդգրկում էր բոլոր տեսակի լրատվությունները՝ միջազգային դրության, հանրապետական իրադարձությունների, քաղաքական, տնտեսական կյանքի, կուսակցական և խորհրդային շինարարության, արհմիությունների, Կարմիր բանակի, կուլտուրայի, գիտության, արվեստի, սպորտի, կենցաղի վերաբերյալ:

¹⁵ Նույն տեղում, էջ 24:

Ծրագիրը 1920-30-ական թվականներին եթեր էր հեռարձակվում հիմնականում երեք լեզուներով՝ հայերեն, ռուսերեն, թուրքերեն, մասամբ էլ քրդերեն¹⁶:

1929 թ. աշնանը հանրապետական ռադիոյում հիմնադրվեց առաջին կուլտուր-լուսավորչական՝ «Համալսարանը՝ ռադիոյով» հաղորդումը, որի նպատակն էր, Մոսկվայի ռադիոհամալսարանի փորձից ելնելով, բարձրացնել ռադիոունկնդիրների կրթական և գիտական մակարդակը: Հաղորդման շրջանակներում հաճախակի կազմակերպվում էին կրթության, արդյունաբերության զարգացման, գյուղատնտեսական վերելքի, խորհրդային շինարարության և դրանց հարակից թեմաներով բանավեճեր և քննարկումներ: Այս հաղորդման հիմնադրմանը ժամանակին անդրադարձել է նաև «Խորհրդային Հայաստան» օրաթերթը: 1929 թ. նոյեմբերի 19-ի համարում «Համալսարանը՝ ռադիոյով» հոդվածում թերթն անդրադարձել է հանրապետությունում ռադիոգործի զարգացմանը, խրախուսել ռադիոհամալսարանի հեռարձակումը հանրապետական ռադիոյով, ողջունել ռադիոհամալսարանին կից գործող խորհրդակցական կայանի աշխատանքը: Երևանի ռադիոհամալսարանը, ինչպես և առաջարկում էին «Խորհրդային Հայաստան» թերթում հանդես եկած հեղինակները, ելնելով Մոսկվայի համալսարանի փորձից, առաջին ուսումնական տարին սկսեց վեց բաժնով՝ հանրակրթական, արդյունաբերական ձեռնարկությունների ռացիոնալիզացիայի, խորհրդային շինարարության, կոոպերացիայի, մանկավարժական և հակակրոնական, որոնցից յուրաքանչյուրի ուսուցումը տևել է 7 ամիս՝ հոկտեմբերի 15-ից մինչև մայիսի 15-ը¹⁷: Հաջորդ ուսումնական տարվանից ռադիոհաղորդումներում մեծ տեղ է հատկացվել գյուղատնտեսական և անասնաբուժական գիտելիքների դասավանդմանը: Դրան համապատասխան՝ ավելացվեցին ռադիոհամալսարանի դասախոսության ժամերը՝ յուրաքանչյուր բաժնի համար նախատեսելով շուրջ 1100 րոպե հաղորդում: Կարճ ժամանակահատվածում ռադիոհամալսարանը դարձավ ամենալսելի և սիրված հաղորդաշարերից մեկը, որը տարիներ շարունակ գիտահանրամատչելի լրատվություն էր մատուցում լսարանին՝ ծանոթացնելով գիտության, տեխնիկայի, կրթության բնագավառում տեղի ունեցող վերջին նորություններին ու հաջողություններին: Կատարելով իր պատմական առաքելությունը՝ 1930-ականների վերջին ռադիոհաղորդումը դադարեց եթեր հեռարձակվելուց՝ իր տեղը զիջելով նոր ձևավորված հասարակական-քաղաքական խմբագրության հաղորդաշարերին:

1929 թ. վերջերին ձևավորվեցին հանրապետական ռադիոկոմիտեի հիմնական կառույցներն ու ստորաբաժանումները, որոնք ունեին 12 աշխատակից և տարեկան պատրաստում էին 2160 եթերաժամ ռադիոհաղորդումներ: ՀԽՍՀ Լուսժողկոմատի արխիվային խունացած փաստաթղթերում մինչև այժմ էլ պահպանվել է 1928 թ. հունիսի 20-ի դրությամբ հրամանագրված հանրապետական ռադիոյի տասներկու հոգուց բաղկացած աշխատակիցների ցուցակը: Համաձայն փաստաթղթի՝ ռադիոկայանի հիմնադիր-անձնակազմի անդամներն էին՝

¹⁶ Տե՛ս Կարազույան Վ., Ռադիոհաղորդումների բնույթը (Ռադիոաշխատող, 1936, N 9-10, էջ 36):

¹⁷ Տե՛ս Մարության Ստ., նշվ. աշխ., էջ 26:

- | | | | |
|-----|-----------------------|---|----------------------------|
| 1. | Ավետիսյան Կոնստանտին | - | ռադիոկայանի վարիչ |
| 2. | Քանանյան Սուրեն | - | ռադիոկայանի վարիչի տեղակալ |
| 3. | Քանանյան Սամվել | - | ռադիստ |
| 4. | Սանդոյան Վարդգես | - | հերթապահ |
| 5. | Շահբազյան Թադևոս | - | ռադիստ |
| 6. | Չարչոյյան Մնացական | - | ռադիոմեխանիկ |
| 7. | Թումասյան Մելիակ | - | ռադիոլսորդ |
| 8. | Չելիշև Կոնստանտին | - | ռադիոլսորդ |
| 9. | Գևորգյան Սարգիս | - | հերթապահ |
| 10. | Մանուկյան Գառնիկ | - | հերթապահ |
| 11. | Խաչատրյան Անդրանիկ | - | հերթապահ |
| 12. | Մելիք-Ստեփանյան Եղիշե | - | պահակ ¹⁸ |

Առաջին հիմնադիր կազմի ռադիոգործում ձեռք բերած նվաճումներն ու հաջողությունները ծանրակշիռ, լուրջ նախադրյալներ ստեղծեցին հաջորդ տասնամյակներում հանրապետական ռադիոյի զարգացման ու բարգավաճման համար: Հաշվի առնելով ստեղծված նյութատեխնիկական բազան և ստեղծագործական ներուժը՝ 1931 թ. դեկտեմբերի 22-ին ՀԽՍՀ Կենտրոնականի նախագահության որոշմամբ ստեղծվեց ՀԽՍՀ ռադիոհաղորդման կոմիտե, որի նախագահ նշանակվեց Ռուբեն Դաշտոյանը¹⁹: Չնայած դրան՝ աշխատանքները իրականում կազմակերպում էր հանրապետական ռադիոյի հիմնադիրներից մեկը՝ Վահրամ Կարազույանը, որը ռադիոն ընդմիջումներով ղեկավարեց մոտ 10 տարի: Նրա օրոք և անմիջական մասնակցությամբ հանրապետական ռադիոյում հիմնադրվեցին հիմնական խմբագրությունները, ինչպես նաև ձևավորվեցին ռադիոյի կազմակերպչական և ստեղծագործական աշխատանքը կարգավորող գործառույթները: 1931 թ. հիմնադրվեց հասարակական-քաղաքական հաղորդումների խմբագրությունը, որտեղ պատրաստվում էր գլխավոր քաղաքական հաղորդումը՝ «Վերջին լուրերը»: Այդ լրատվական հաղորդումները սկսեցին եթեր հեռարձակվել նախօրոք հայտնի և կոնկրետ ժամի, որպեսզի ռադիոլսարանը մշտապես տեղյակ լինի օրվա ընթացքում տեղի ունեցող իրադարձություններին, դեպքերին և փաստերին: Հաշվի առնելով օպերատիվ լրատվության նկատմամբ լսարանի աճող հետաքրքրությունը՝ ռադիոկոմիտեի ղեկավարությունը 1932 թ. նոյեմբերի 11-ին որոշում կայացրեց ռադիոհաղորդումների ցանցից հանել ռադիոթերթերը՝ դրանք փոխարինելով ռադիոտեղեկագրերով (ռադիոբյուլետեններով): Ռադիոտեղեկագրերով հաղորդվող հոդվածները, թղթակցությունները, ելույթները, զրույցները, տեղեկությունները ծավալային առումով շատ ավելի փոքր էին, հակիրճ ու կոնկրետ, քան ռադիոթերթերի երկարաշունչ, հաճախ էլ ոչ օպերատիվ լրատվությունը: Նորարարությունը ավելի էր համապատասխանում ռադիոյի տեխնիկական և ստեղծագործական

¹⁸ Նույն տեղում, ֆ. 127, ց. 1, գ. 15, թ. 52:

¹⁹ Նույն տեղում, գ. 16, թ. 45:

առանձնահատկություններին՝ նախանշելով օպերատիվության ասպարեզում նրա առավելությունները մյուս զանգվածային լրատվամիջոցների նկատմամբ: Մալայմանավորված էր նաև ռադիոյի համեմատ թերթի օպերատիվության աստիճանական թուլացմամբ: Ռադիոն օպերատիվությամբ սկսեց գերազանցել տպագիր խոսքին և ստեղծել այդ և այլ յուրահատկություններով համապատասխան ռադիոհաղորդումներ: Դրա առաջին կիրառություններից էին հասարակական-քաղաքական հաղորդումների կողմից կազմակերպված առաջին ուղիղ ռադիո-ռեպորտաժը Երևանի Լենինի (այժմ՝ Հանրապետության) հրապարակից, 1934թ. մայիսի 1-ին: Այդ ռադիոռեպորտաժը վարել է ռադիոյի լավագույն հաղորդավարներից մեկը՝ Եղիշե Հովհաննիսյանը: Հետագա տարիներին մայիսմեկյան շքերթի ուղիղ ռեպորտաժը ռադիոյով հաղորդելը դարձավ ավանդական և շարունակվեց մինչև 1988 թ.: Մայիսմեկյան առաջին ռեպորտաժին հաջորդեց 1937 թ. սեպտեմբերի 15-ին տեղի ունեցած առաջին մարզական ուղիղ ռեպորտաժը հանրապետական մարզադաշտից՝ Երևանի «Մպարտակ» և Մոսկվայի «Դինամո» ֆուտբոլային թիմերի մասնակցությամբ:

Այսպիսով, 1927-1934 թթ. հիմնադրվեցին հասարակական-քաղաքական երաժշտական, գրական-դրամատիկական, մանկապատանեկան հաղորդումների գլխավոր խմբագրությունները, ձևավորվեցին և գործնականում կիրառվեցին առաջին ռադիոժանրերը, ռադիոյի արտահայտչամիջոցները, հաղորդումների և ծրագրերի տեսակները, որոնք ամբողջացրին ռադիոկոմիտեի ստեղծագործական աշխատանքը՝ նախադրյալներ ստեղծելով ռադիոժուռնալիստիկայի հիմնական գործառնությունների և առանձնահատկությունների ձևավորման, կայացման և զարգացման համար:

ОСНОВАНИЕ ОБЩЕСТВЕННОГО РАДИО АРМЕНИИ

ОВСЕПЯН М. М.

Резюме

В общественном (республиканском) радио в первые годы вещания регулярная структура радиопрограмм была чрезвычайно редкой, а форма и содержание передач отличались пестротой. Радиопередачи, в основном, были посвящены трансляции музыкальных концертов, литературных чтений, драматических постановок, бесед в эфире, граммофонных записей. Были заложены основы радиointervью и радиорепортажа.